

# Projects solars en Stussavgia buca rentabels

Il tempo da turbo dil SolarExpress ed ils prezis bass da forz'electricca ein il motiv ch'ils dus projects solars alpins Alp da Tenna ed Alp Falätscha en Stussavgia ein vegni sisti. Per las corporaziuns d'alp, per l'interpresa SN Energias Regenerablas e per la vischnaunca da Stussavgia ston las cundiziuns economicas constar per ch'ils dus projects solars sappien vegnir reactivai.

MARTIN GABRIEL /FMR

Dapi il matg 2023 han las corporaziuns d'Alp da Tenna ed Alp Falätscha ensemen cull'interpresa SN Energias Regenerablas (SNE) da Sogn Gagl contrahau e svilup-pau ils dus projects alpins d'energia solara. Il fevver 2025 hai dau ina sera d'informaziun publica davart ils dus projects e proximamein fussen ils implonts solars cun total 50 000 panels ed ina prestaziun totala da bunamein 34 uras gigawatt vegni discutai alla radunonza communal da Stussavgia. La decisiun da sistir ils projects solars Alp da Tenna e Falätscha ei vegnida dada dall'interpresa SNE suenter haver discutau cun ils representants dallas duas corporaziuns d'alp. Il menader da gestiun dalla SNE, *Andreas Jossi* di en discurs cun la FMR, ch'ils implonts seigien vegni mess ella glatschera pil mument per quei ch'ils prezis da forz'electricca seigien memia bass ed ils termins dil SolarExpress lubeschien buca pli da realisar ils implonts solars ad uras.

## Il stress cugl express

Ferton che la vischnaunca ei stada involvada mo agl ur els dus projects solars ein ils representants dallas duas corporaziuns d'alp stai ils partenaris da discussiun dall'interpresa d'energia solara. Per *Thomas Buchli* dalla corporaziun Alp da Tenna detti il spazi da temps dil SolarExpress buca la puseviltad da sclearir tut ils detagls era per mauns dalla populaziun che hagi alla fin da decider davart ils projects solars. «Per nus purs eis ei ordvart difficil da decider da metter a disposiziun ina gronda surfatscha da



Sin l'Alp da Tenna (foto) e las Alps Falätscha fussen las ovras solaras vegnidadas construidas. Ussa ein ils dus projects sisti pervia dils termins dil SolarExpress e pervia dils prezis d'energia memia bass.

FOTO MAD

terren, sche l'ovra solara che vegn baghegiada sin quei terren satisfa buca al las pretensiuns economicas.»

## Ovras buca rentabels

Il secund motiv ch'ils dus projects alpins en Val Stussavgia ein vegni sisti ein las re-

salvas dall'interpresa SNE. Ella ha viu a basa dad auters projects che las investiziuns ella muntogna ein fetg grondas e che quellas investiziuns sepagan mo lu, sch'ils prezis da forz'electricca ein buca memia bass. *Andreas Jossi*, il meinaproject dils implonts solars projectai en

Stussavgia, di che cunzun igl unviern stuessi ins haver prezis pli aults per la vendita d'energia solara. Quels seigien denton bia memia bass: «2023 cura che nus havein entschiet a projectar en Stussavgia, eran ils prezis pli aults. Ad intermin ein ils prezis curdai aschi fetg che las duas

ovras solaras alpinas en Stussavgia fussen buca pli rentabels.»

## La speranza miera il davos

*Andreas Jossi* dall'interpresa SNE accentuescha ch'ins hagi sistiu e buca satrau ils dus projects solars en Stussavgia «Jeu sun involvaus en projects d'energia da vent ch'ei vegni projectai suenter igl onn 2000 e lu sisti. Oz vegnan quels implonts d'energia realisai. Sistir munta per mei da metter dalla vart e spitgar sin meglieras cundiziuns economicas.» Las duas ovras solaras Alp da Tenna ed Alp Falätscha producessen forz'electricca per 7000 casadas, scriva il concern SNE. «Quei potenzial stuess ins exnum trer a nez dil mument che nus havein meglieras cundiziuns», di *Andreas Jossi*. Cun meglieras cundiziuns manegia *Jossi* era las contribuziuns da promozion dalla Confederaziun che duessian vegnir pagadas suenter il SolarExpress.

## Aviarts e sceptics

«Jeu deplureschel d'ina vart ch'ils projects ein sisti», di il president communal da Stussavgia *Lukas Züst*. «Da l'autra vart sun jeu era cuntents ch'ins ei davart dil concern d'energia SNE aschi realistic e desista avon che surbaghegiar duas alps e da buca haver success culla vendita d'energia.» *Lukas Züst* ha survegniu fetg paucas reacziuns da vischins alla novitad ch'ils implonts vegnien buca construi. «La populaziun da Stussavgia ei da principi aviarta per energias alternativas. Mo jeu crei era ch'ei havess dau entginas vuschs fetg sceptics enviers ils projects solars alpins, sche nus havessan discussiunau sur da quels alla radunonza communal.»

# In'egliada artistica sin la Lumnezia

La Residenza ha envidau diesch artistas ed artists digl entir mund da prender dimora per quater jamnas en Lumnezia.

Ils fretgs da quella scuntrada artistica internaziunala cun egliada sin la Lumnezia vegnan presentai il vendergis proxim el Benefeci a Rumein.



Bettina Lidzba e Laura Schoch (da sen.) han viviu e luvrau quater jamnas sut il medem tetg.

FOTO CORINNE THOENI



Leander Albin (davontier) ha organisau da cuminonza cun Aline Schoch la Residenza 2025 el Benefeci da Rumein.

FOTOS ANDREAS CADONAU

ANDREAS CADONAU/FMR

*Laura Schoch* ei seprofundada en sia lavur ella casa dil Benefeci da Rumein. Ella sesa giun plaun, truscha colurs e picturescha las mischeidas sin in pupi. *Laura Schoch* ei ina dallas diesch artistas ed artists che la Fundaziun da cultura Lumnezia ha envidau da prender dimora en Lumnezia, a caschun dalla schinumnada Residenza. Mess en pei quella Residenza han *Aline Schoch* e *Leander Albin* avon treis onns a Tersnaus. «Nus essan uonn per l'emprega ga da casa el Benefeci da Rumein e dapi dus onns ei la Residenza part dalla Fundaziun da cultura Lumnezia», explichescha *Leander Albin*. Aschia che la Residenza per artistas ed artists collaborescha stretg

cun la Casa d'Angel a Lumbrein e siu curatur *Marco Coray*.

## Dimora per quater jamnas

Buca meins che 25 artistas ed artists digl entir mund ein s'annunziat tier *Aline Schoch* e *Leander Albin* cul giavisch da separticipar alla Residenza 2025. «Nus essan stai empau surstai digl eco.» *Leander Albin* ed *Aline Schoch* han, da cuminonza cun *Marco Coray*, dau suatientscha a diesch annunziats: artistas ed artists che vegnan dalla Svizra, dalla Tiara-tudestga, dil Danemarc, dil Canada e schizun dalla Islanda. «Nus havein buc exnum elegiu els tenor lur derivonza, mobein tenor lur moda e maniera da luvrar.» *Leander Albin* gi ch'ins seigi sapientivamein sedecidius per diversas mo-

## «Nus essan stai empau surstai digl eco.»

*Aline Schoch* e *Leander Albin*, fundatur Residenza

das da sefatschentar cun art. «Ellas tonschan da musica, videos, lavur cun lenn, pictura ed auter.»

Las artistas ed ils artists han retschiert l'incumbensa da sefatschentar en ina moda ni l'autra cun la Lumnezia. *Leander Albin* manegia che la diversitad artistica animeschi la collaboraziun denter ils habitonts dil Benefeci. «Ins havess secapescha era saviu envidar persunas che sefatschentan cun il medem art ed aschia caschunar ina situaziun da concurrenza.»

## Viver e luvrar sut in tetg

*Laura Schoch* viva e lavura dapi la fin d'avrel 2025 sut il tetg dil Benefeci cun las ulteriuras nov artistas ed artists. Enconuschiu ha ella negin dils presents, la

cuminonza da viver e luvrar quater jamnas el medem liug valetescha l'artista svizra sco fetg ispironta. «Jeu enconuschiel la Lumnezia sco quei ch'ins enconuscha ella sco hosp da vacanzas sin in tura ella Greina.» Dapi quater jamnas mira *Laura Schoch* cun in'otra egliada sin la val. «Jeu hai constatau che la Lumnezia ei detg idillica.» Mo *Laura Schoch* ei buc exmun vegnida a Rumein per documentar l'idilla lumneziana. Tgi che s'interessescha per la vosta da *Laura Schoch* e dallas ulteriuras artistas ed artists sin la Lumnezia ei envidaus da mirar las lavurs creadas ella Residenza a caschun dalla vernissascha dils 23 da matg 2025 allas 18.00 el Benefeci a Rumein. L'exposiziun ei aviarta entochen ils 24 da matg 2025 allas 16.00.